



Broj: 01/1-50-1-1-62/06

Sarajevo: 02.03.2006.

Z A P I S N I K

sa 62. sjednice Ustavno - pravne komisije

Sjednica je održana 02.03.2006. godine sa početkom u 11,00 sati.

Sjednici su prisustvovali članovi Komisije:

- | | |
|-----------------------|----------------------|
| 1. Mirsad Ćeman, | 5. Petar Kunić. |
| 2. Filip Andrić, | 6. Tihomir Gligorić, |
| 3. Momčilo Novaković, | 7. Mirsad Sipović i |
| 4. Beriz Belkić | 8. Martin Raguž. |

Član Komisije Nijaz Duraković nije prisustvovao sjednici iz opravdanih razloga.

U ime predlagača Vijeća ministara BiH sjednici su prisustvovali Niko Grubešić i Dženita Fočo; poslanici: Jozo Križanović, Mladen Potočnik, Elmir Jahić, Ljiljana Milićević, Vlatka Komšić i Miloš Jovanović; predstavnici OHR-a Maja Ribar, Andrea Šperer i Denis Gnjidić; predstavnik OSCE-a Dario Šikuljak; predstavnici NATO-a Rafi Gregorijan, Jasmin Mekić i Lejla Gelo i Istraživačkog centra PS BiH Edin Isanović i Adnan Bešić.

Sjednici je prisustvovao sekretar Komisije Milan Zjajić i pripravnici volonteri Ivana Šupeta i Vildan Hadžihasanović.

Predsjedavajući Ćeman je predložio sljedeći:

D N E V N I R E D :

1. Verificiranje Zapisnika sa 61. sjednice održane 13.02.2006. godine;
2. Prijedlog zakona o izmjenama i dopunama Zakona o carinskoj politici Bosne i Hercegovine, predlagač Vijeće ministara BiH;
3. Prijedlog zakona o izmjenama i dopunama Zakona o porezu na dodatu vrijednost, predlagači Beriz Belkić i drugi;
4. Prijedlog Amandmana na Ustav BiH, predlagač Mladen Potočnik;
5. Prijedlog zakona o praznicima Bosne i Hercegovine, predlagači Zlatko Lagumdžija, Jozo Križanović i Selim Bešliagić;
6. Prijedlog zakona o izmjenama i dopunama Izbornog zakona Bosne i Hercegovine, predlagači Momčilo Novaković, Elmir Jahić i Vinko Zorić;
7. Prijedlog zakona o dopunama zakona Bosne i Hercegovine o izvršenju krivičnih sankcija, pritvora i drugih mjera, predlagač Momčilo Novaković;
8. Prijedlog zakona o primjeni privremenih mjera prema osobama koje su optužene a nisu dostupne Međunarodnom krivičnom sudu za bivšu Jugoslaviju i osobama uključenim u pružanje pomoći osobama optuženim od strane Međunarodnog krivičnog suda za bivšu Jugoslaviju, predlagač Vijeće ministara BiH;
9. Zahtjevi Ustavnog suda BiH za davanje odgovora na:
 - a) Zahtjev **Borislava Paravca** za ocjenu usaglašenosti sa Ustavom BiH odredbi člana 5. tačka 2. i 6.; člana 7. tačka 2.; člana 46. tačka 3.; člana 49. tačka 3. i člana 51. tačka 2., 4. i 5. **Zakona o osnivanju kompanije za prenos električne energije u BiH** ("Službeni glasnik BiH" br. 35/04);
 - b) Zahtjev **Sulejmana Tihica** za ocjenu usaglašenosti sa Ustavom BiH odredbi člana 8.1 stav 1. i 2. **Izbornog zakona BiH** ("Službeni glasnik BiH" br. 23/01, 7/02, 9/02, 20/02, 25/02, 25/02, 4/04 i 25/05);
10. Ostala pitanja.

Dnevni red je jednoglasno usvojen.

Ad. 1. Verificiranje Zapisnika sa 61. sjednice održane 13.02.2006.

Uz primjedbu Beriza Belkića da je uz Vinka Zorića i Momčila Novakovića kao predlagača Izmjena i dopuna Izbornog zakona BiH trebalo navesti i Elmira Jahića, iako on nije potpisao propratni akt uz Predloženi zakon, Komisija je jednoglasno verificovala zapisnik sa 61. sjednice održane 13.02.2006. godine.

Ad. 2. Prijedlog zakona o izmjenama i dopunama Zakona o carinskoj politici Bosne i Hercegovine, predlagač Vijeće ministara BiH;

Nakon provedene rasprave, Ustavno-pravna komisija Predstavničkog doma je jednoglasno utvrdila sljedeće:

1. Postoji valjan ustavno-pravni osnov za donošenje Zakona o izmjenama i dopunama Zakona o carinskoj politici Bosne i Hercegovine,
2. Ustavni osnov sadržan je u članu III/1 c) i članu IV tačka 4. a) Ustava Bosne i Hercegovine, kako je naveo predlagač,
3. Ponuđeni tekst je usklađen sa Ustavom Bosne i Hercegovine i
4. Ponuđeni tekst se može uputiti nadležnoj komisiji Predstavničkog doma Parlamentarne skupštine BiH u dalju proceduru.

Ad. 3. Prijedlog zakona o izmjenama i dopunama Zakona o porezu na dodatu vrijednost, predlagači Beriz Belkić i drugi;

Nakon provedene rasprave, Ustavno-pravna komisija Predstavničkog doma je većinom glasova utvrdila sljedeće:

1. Postoji valjan ustavno-pravni osnov za donošenje Zakona o izmjenama i dopunama Zakona o porezu na dodatu vrijednost,
2. Ustavni osnov sadržan je u članu III tačka 1. e); članu IV tačka 4. a) ; članu VIII tačka 3. Ustava Bosne i Hercegovine, kako je naveo predlagač,
3. Ponuđeni tekst je usklađen sa Ustavom Bosne i Hercegovine i
4. Ponuđeni tekst se može uputiti nadležnoj komisiji Predstavničkog doma Parlamentarne skupštine BiH u dalju proceduru.

Ad. 4. Prijedlog Amandmana na Ustav BiH, predlagač Mladen Potočnik;

Nakon duže rasprave u kojoj su pored predlagača učestvovali i svi članovi Komisije i u kojoj su iznošeni različiti stavovi počevši od toga da se radi o legitimnoj inicijativi do apsolutnog osporavanja kao neozbiljnog poteza u konstelaciji sa velikim naporima koji se ulažu u okviru rukovodstva najvećih političkih partija u BiH pod rukovodstvom SAD, izjašnjavanje je odgođeno za narednu sjednicu.

Ad. 5. Prijedlog zakona o praznicima Bosne i Hercegovine, predlagači Zlatko Lagumdžija, Jozo Križanović i Selim Bešlić;

Nakon duže rasprave u kojoj su članovi Komisije pozdravili uložene amandmane i ocijenili da su oni sigurno određeni napredak, ali zbog toga što su ih dobili baš na dan održavanja sjednice smatrali su da im treba još vremena da ih u potpunosti razmotre i o njima se izjasne. Zbog toga je jednoglasno, ponovo odgođeno izjašnjavanje o principima i amandmanima..

Ad. 6. Prijedlog zakona o izmjenama i dopunama Izbornog zakona BiH, predlagači Momčilo Novaković i Vinko Zorić;

Nakon duže rasprave Komisija je konstatovala da je na Predloženi zakon uloženo 66 amandmana, stim da se jednim amandmanom predlaže izmjena jednog cijelog poglavlja od 12 članova.

Zbog bojazni da neki od predloženih amandmana nije konzistentan sa tekstom zakona i činjenice da su predstavnici Radne grupe, koja je predlagač zakona, tražili dodatno vrijeme za kvalitetnu analizu i provjeru konzistentnosti predloženih amandmana, Komisija je jednoglasno odlučila da odgodi izjašnjavanje za narednu sjednicu.

Komisija je cijenila situaciju i neophodnost da Predloženi zakon stupi na snagu do 1. aprila, te u vezi sa tim je predloženo;

- da Radna grupa do 9. marta 2006. godine izvrši analizu predloženih amandmana;
- da zatim Ustavno-pravna komisija, kao nadležna komisija podnese izvještaj tako da bi na sjednici Predstavničkog doma, najksnije do 20. marta 2006. Prijedlog zakona bio razmatran u prvom i drugom čitanju;
- da se tajming uskladi i kordinira sa Kolegijem i Ustavno-pravnom komisijom Doma naroda.

Jednoglasno je zaključeno da se u skladu sa Poslovníkom od Kolegija Doma traži produženje roka za podnešenje izvještaja nadležne komisije Predstavičkom domu Parlamentarne skupštine Bosne i Hercegovine.

Ad. 7. Prijedlog zakona o dopunama zakona Bosne i Hercegovine o izvršenju krivičnih sankcija, pritvora i drugih mjera, predlagač Momčilo Novaković;

Nakon iscrpne opće i rasprave o pojedinostima, Ustavno-pravna komisija je kao nadležna komisija:

1. Sa četiri glasa "za", dva glasa "protiv" i jednim "uzdržanim" podržala principe predloženog zakona,
2. Konstatirala da nije bilo uloženi amandmana.
3. Sa četiri glasa "za", tri glasa "protiv" i bez "uzdržanih" prihvatila tekst Prijedloga zakona Bosne i Hercegovine o izvršenju krivičnih sankcija, pritvora i drugih mjera kako ga je predložio predlagač.
4. Konstatirala da je predloženi zakon neophodno donijeti.

U smislu odredbi člana 89. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenuje se predsjedavajući Komisije Mirsad Ćeman.

Ad. 8. Prijedlog zakona o primjeni privremenih mjera prema osobama koje su optužene a nisu dostupne Međunarodnom krivičnom sudu za bivšu Jugoslaviju i osobama uključenim u pružanje pomoći osobama optuženim od strane Međunarodnog krivičnog suda za bivšu Jugoslaviju, predlagač Vijeće ministara BiH;

Nakon iscrpne opće i rasprave o pojedinostima, Ustavno-pravna komisija je kao nadležna komisija:

1. Jednoglasno podržala principe predloženog zakona,
2. Konstatirala da je amandmane uložio poslanik Momčilo Novaković. Nakon provedenog glasanja prihvaćeni su sljedeći amandmani:

AMANDMAN I

Naziv predloženog zakona mijenja se i glasi:

"ZAKON

o primjeni određenih privremenih mjera radi efikasnog provođenja mandata Međunarodnog krivičnog suda za bivšu Jugoslaviju te drugih međunarodnih restriktivnih mjera".

AMANDMAN II

U oznaci poglavlja ispred člana 1. Prijedloga zakona, ispred rimskog broja I dodaje se riječ "**POGLAVLJE**", a iza rimskog broja I stavlja se interpunkcijski znak tačka, pa glasi:

"POGLAVLJE I. OPŠTE ODREDBE"

Član 1. (*Predmet*) Prijedloga zakona mijenja se i glasi:

"Član 1.

(Predmet i svrha ovog zakona)

(1) Ovim se zakonom uređuje primjena međunarodnih restriktivnih mjera koje, u skladu s međunarodnim pravom, Bosna i Hercegovina primjenjuje protiv država, međunarodnih organizacija, teritorijalnih entiteta, pokreta ili fizičkih i pravnih lica te drugih subjekata obuhvaćenih međunarodnim restriktivnim mjerama.

(2) Ovim se zakonom posebno uređuje uvođenje i primjena određenih privremenih mjera u svrhu privremenog sprečavanja korištenja, otuđenja ili drugog raspolaganja imovinom lica optuženih pred Međunarodnim krivičnim sudom za teška kršenja međunarodnog humanitarnog prava počinjena na području bivše Jugoslavije od 1991. godine (skraćeno: Međunarodni krivični sud za bivšu Jugoslaviju; u daljem tekstu: MKSJ), a koja nisu dostupna tom sudu i njihovih pomagača u izbjegavanju dostupnosti tom sudu.

(3) Svrha ovog zakona je da se u Bosni i Hercegovini predvidi način provođenja rezolucija Vijeća bezbjednosti Organizacije ujedinjenih nacija ili odluka Evropske unije koje predviđaju međunarodne restriktivne mjere, a posebno Rezolucija Vijeća bezbjednosti Ujedinjenih nacija 1503 (2003) primjenom određenih mjera u cilju efikasnog provođenja mandata MKSJ-a."

AMANDMAN III

Iza (izmjenjenog) člana 1. Prijedloga zakona dodaje se novi član 2. koji glasi:

"Član 2.

(Međunarodne restriktivne mjere)

(1) Međunarodne restriktivne mjere uključuju embargo na oružje, potpune ili djelomične restrikcije uvoza ili izvoza, restrikcije ulaska u zemlju, finansijske restrikcije, te druge mjere u skladu s međunarodnim pravom.

(2) Međunarodne restriktivne mjere Bosna i Hercegovina primjenjuje zbog provođenja međunarodnopravno obavezujućih odluka Organizacije ujedinjenih nacija ili kada se pridruži restriktivnim mjerama Evropske unije ili u drugim slučajevima u skladu s međunarodnim pravom.

(3) O načinu uvođenja, provođenja i ukidanja međunarodnih restriktivnih mjera koje nisu posebno uređene ovim zakonom odlučuje Vijeće ministara Bosne i Hercegovine (u daljem tekstu: Vijeće ministara) nakon konsultacije s Predsjedništvom Bosne i Hercegovine.

(4) Na finansijske restrikcije primjenjuju se odredbe Poglavlja II. i III. ovog zakona, i kad se provode protiv drugih lica osim optuženih pred MKSJ-om a nedostupnih tom sudu i njihovih pomagača, ukoliko međunarodnim pravom nije drugačije određeno.

(5) Ministarstvo inostranih poslova Bosne i Hercegovine i Direkcija za EU integracije Vijeća ministara dužni su odmah obavijestiti Vijeće ministara i Predsjedništvo Bosne i Hercegovine o određivanju međunarodnih restriktivnih mjera."

AMANDMAN IV

Član 2. (*Značenje izraza*) Prijedloga zakona, koji postaje član 3, mijenja se i glasi:

"Član 3.

(Značenje izraza u smislu ovog zakona)

U smislu ovog zakona, pojedini izrazi imaju sljedeće značenje:

a) "Optuženo lice" je lice protiv kojeg je podignuta optužnica pred MKSJ-om, a koje nije dostupno tom sudu.

b) "Pomagač optuženog lica" je svako fizičko ili pravno lice za koje postoje osnove sumnje da pruža pomoć optuženom licu u izbjegavanju dostupnosti MKSJ-u, uključujući i bračnog ili vanbračnog partnera, srodnika po krvi u pravoj liniji, brata ili sestru, usvojioca ili usvojenika i njihovog bračnog ili vanbračnog partnera. Pomagač je takođe i branilac, liječnik ili vjerski ispovjednik optuženog lica ako postoje osnove sumnje da pomoć koju pruža optuženom licu nije pomoć u okviru svog stručnog djelovanja, već pomoć u izbjegavanju dostupnosti MKSJ-u.

c) "Fondovi" znače bilo kakvu finansijsku imovinu ili korist, kao što su:

1) gotovina, čekovi, novčana potraživanja, mjenice, platni nalozi i drugi instrumenti plaćanja,

2) depoziti kod finansijskih institucija ili drugih subjekata, salda na računima, potraživanja i prava koja proizilaze iz potraživanja,

3) vrijednosni papiri koji su predmet berzanske ili druge vrste prodaje, kao što su dionice ili udjeli, certifikati, obaveznice i druge vrste vrijednosnih papira,

4) kamate, dividende i drugi prihodi koji proističu iz imovine,

5) kredit, pravo na kompenzaciju, garancije izvršenja i druga finansijska prava,

6) kreditna pisma, konosmani, otpremnice, zaključnice,

7) dokumenti kojima se dokazuje interes u fondovima ili finansijskim sredstvima,

8) svaki drugi instrument kojim se finansira izvoz.

d) "Ekonomska sredstva" znače svaku vrstu imovine, materijalnu i nematerijalnu te pokretnu i nepokretnu, koja ne predstavlja fondove ali se može koristiti za sticanje fondova, roba ili usluga."

AMANDMAN V

Iznad člana 3. Prijedloga zakona, koji postaje član 4, dodaje se oznaka poglavlja II s naslovom koji glasi: "POGLAVLJE II. FINANSIJSKE PRIVREMENE MJERE PROTIV LICA OPTUŽENIH PRED MKSJ-OM I NJIHOVIH POMAGAČA".

Član 3. (*Vrste privremenih mjera*) Prijedloga zakona, koji postaje član 4, mijenja se i glasi:

"Član 4.

(Vrste finansijskih privremenih mjera po ovom zakonu)

(1) Privremene mjere, koje se po ovom zakonu primjenjuju u svrhu privremenog sprečavanja korištenja, otuđenja ili drugog raspolaganja imovinom su:

a) zamrzavanje fondova; i

b) zamrzavanje ekonomskih sredstava.

(2) Zamrzavanje fondova je sprečavanje bilo kakvog kretanja, transfera, izmjene, upotrebe, pristupa ili upravljanja ili raspolaganja fondovima koje bi dovelo do promjene u njihovom obimu, iznosu, lokaciji, vlasništvu, posjedu, karakteru, destinaciji ili do kakve drugačije promjene koja bi omogućila korištenje fondova, uključujući i upravljanje fondovima odnosno portfeljom.

(3) Zamrzavanje ekonomskih sredstava je sprečavanje njihovog korištenja u svrhu sticanja fondova, roba ili usluga bilo na koji način, kao što je njihova prodaja, najam ili stavljanje pod hipoteku."

AMANDMAN VI

Iza člana 3. Prijedloga zakona, koji postaje (izmijenjeni) član 4, dodaju se novi članovi 5. do 9, koji glase:

"Član 5.

(Značaj privremenih mjera)

(1) Primjenom privremenih mjera zamrzavanja fondova i zamrzavanja ekonomskih sredstava se:

- a) zamrzavaju svi fondovi i ekonomska sredstva koja pripadaju ili su u vlasništvu ili posjedu ili ih drži lice prema kojem se mjere primjenjuju;
- b) fondovi i ekonomska sredstva ne mogu učiniti dostupnima, direktno ili indirektno, u ime ili u korist lica prema kojem se mjere primjenjuju; i
- c) zabranjuju bilo kakve radnje s ciljem, direktnog ili indirektnog, svjesnog zaobilaženja mjera iz tački a) i b) ovog stava.

(2) Odredba tačke b) stava (1) ne odnosi se na potraživanja (priliv) zamrznutih računa po osnovi kamata ili drugih koristi odnosno prihoda tih računa ili po osnovi uplata po ugovorima ili sporazumima koji su zaključeni ili potraživanja koja su se pojavila prije početka primjene odluke o primjeni mjera prema određenom licu, pod uslovom da se na svaku takvu kamatu ili drugu korist odnosno prihod ili uplatu i dalje primjenjuje odredba tačke a) stava (1) ovog člana.

(3) Odredba tačke b) stava (1) ovog člana ne sprečava doznačivanje na zamrznuti račun od strane finansijske institucije koja primi fondove transferisane od trećih u korist računa lica prema kojem se primjenjuju mjere, pod uslovom da su sva takva doznačena potraživanja (priliv) po tom računu takođe zamrznuta.

Član 6.

(Obaveza dostavljanja informacija)

(1) Fizička i pravna lica, organizacije, organi i institucije će odmah po saznanju dostaviti Ministarstvu bezbjednosti Bosne i Hercegovine (u daljem tekstu: Ministarstvo bezbjednosti) svaku informaciju o provedbi odluke o primjeni mjera prema određenom licu, kao što je informacija o zamrznutim računima i iznosima, i surađivaće s Ministarstvom bezbjednosti u provjeri takvih informacija.

(2) Posebno će finansijske institucije informisati Ministarstvo bezbjednosti o izvršavanju doznaka iz člana 5. (*Značaj privremenih mjera*) stava (3) ovog zakona.

(3) Ministarstvo bezbjednosti može koristiti informacije iz ovog člana samo u svrhu u koju je informacija dostavljena.

Član 7.

(Vođenje zbirke podataka)

(1) Ministarstvo bezbjednosti osniva i vodi zbirku podataka o licima protiv kojih su uvedene međunarodne restriktivne mjere odnosno privremene mjere po ovom zakonu.

(2) Podaci iz zbirke podataka dostupni su institucijama Bosne i Hercegovine i drugim institucijama ili organima kojima su podaci potrebni u okviru njihove nadležnosti odnosno za obavljanje ovlaštenih djelatnosti, pri čemu se primjenjuju propisi o zaštiti ličnih podataka i o zaštiti tajnosti podataka.

(3) Ministarstvo bezbjednosti dostavlja podatke iz zbirke podataka na zahtjev Organizacije ujedinjenih nacija ili Evropske unije.

Član 8.

(Izuzeci za životne troškove)

(1) Izuzetno od člana 5. (*Značaj privremenih mjera*) stava (1) ovog zakona, Sud Bosne i Hercegovine će odobriti oslobađanje pojedinih zamrznutih fondova ili ekonomskih sredstava ili odobriti da se oni učine dostupnim, ukoliko utvrdi da su fondovi ili ekonomska sredstva neophodni za podmirenje osnovnih životnih troškova, uključujući troškove prehrane, stanarine odnosno najamnine ili hipoteke za prostor stanovanja, lijekova i liječenja, poreza i osiguranja, ili troškova javnih komunalnih usluga.

(2) Izuzetno od člana 5. stava (1) ovog zakona, Sud Bosne i Hercegovine može takođe odobriti oslobađanje pojedinih zamrznutih fondova ili ekonomskih sredstava ili odobriti da se oni učine dostupnim, ukoliko utvrdi da su fondovi ili ekonomska sredstva:

a) namijenjeni isključivo plaćanju nagrade i nadoknade troškova profesionalne pravne pomoći, u razumnom iznosu; ili

b) namijenjeni isključivo za plaćanje naknade za redovno vođenje zamrznutih fondova ili ekonomskih sredstava; ili

c) neophodni za vanredne troškove.

(3) Odlučujući prema stavu (1) i (2) ovog člana, Sud Bosne i Hercegovine može odrediti uslove pod kojima odobrava oslobađanje odnosno dostupnost fondova ili ekonomskih sredstava.

(4) Sud Bosne i Hercegovine će obavijestiti Ministarstvo bezbjednosti Bosne i Hercegovine o odobrenju iz ovog člana najkasnije osam dana prije davanja odobrenja.

(5) Ministarstvo bezbjednosti će o svakom odobrenju o kojem je odlučeno prema ovom članu obavijestiti nadležne organe međunarodnih organizacija i država koje primjenjuju iste restriktivne mjere prema istim licima.

Član 9.

(Izuzeci za pojedine obaveze)

(1) Izuzetno od člana 5. (*Značaj privremenih mjera*) stava (1) ovog zakona, Sud Bosne i Hercegovine takođe može odobriti oslobađanje pojedinih zamrznutih fondova ili ekonomskih sredstava pod sljedećim uslovima:

a) ako su fondovi ili ekonomska sredstva postali predmet obaveze po sudskoj, upravnoj ili arbitražnoj odluci prije početka primjene odluke o primjeni mjera prema određenom licu, i

b) ako će se fondovi ili ekonomska sredstva koristiti isključivo radi izmirenja takve obaveze, i

c) ako sudska, upravna ili arbitražna odluka nije donesena u korist lica prema kojem su primijenjene privremene mjere zamrzavanja fondova i ekonomskih sredstava, i

d) ako se priznanje takve obaveze ne protivi pravnom poretku Bosne i Hercegovine.

(2) Sud Bosne i Hercegovine će obavijestiti Ministarstvo bezbjednosti Bosne i Hercegovine o odobrenju iz ovog člana najkasnije osam dana prije davanja odobrenja.

(3) Ministarstvo bezbjednosti će o svakom odobrenju o kojem je odlučeno prema ovom članu obavijestiti nadležne organe međunarodnih organizacija i država koje primjenjuju iste restriktivne mjere prema istim licima."

AMANDMAN VII

Ispred člana 4. Prijedloga zakona, koji postaje član 10, redni broj i naslov poglavlja mijenja se i glasi:

"POGLAVLJE III. PRIMJENA FINANSIJSKIH PRIVREMENIH MJERA PROTIV LICA OPTUŽENIH PRED MKSJ-OM I NJIHOVIH POMAGAČA".

Član 4. (*Postupak*) Prijedloga zakona, koji postaje član 10, mijenja se i glasi:

"Član 10.

(Primjena prema optuženim licima)

(1) U Bosni i Hercegovini primjenjuju se privremene mjere zamrzavanja fondova i zamrzavanja ekonomskih sredstava lica optuženih pred MKSJ-om a nedostupnih tom sudu.

(2) Lista lica iz stava (1) ovog člana prema kojima se primjenjuju određene mjere, koju je utvrdila Organizacija ujedinjenih nacija ili Evropska unija, uključujući i sve njene izmjene i dopune, primjenjuju se u Bosni i Hercegovini, u skladu sa stavom (3) ovog člana.

(3) Vijeće ministara Bosne i Hercegovine donosi odluku kojom uvodi privremene mjere iz stava (1) prema licima optuženim pred MKSJ-om a nedostupnim tom sudu na osnovu liste iz stava (2) ovog člana i objavljuje je u «Službenom glasniku Bosne i Hercegovine».

(4) Protiv odluke Vijeća ministara iz stava (3) ovog člana može se pokrenuti postupak pred Sudom Bosne i Hercegovine.

(5) Ministarstvo inostranih poslova Bosne i Hercegovine i Direkcija za EU integracije Vijeća ministara dužni su odmah obavijestiti Vijeće ministara o utvrđivanju liste lica iz stava (2) ovog člana."

AMANDMAN VIII

Član 5. (*Primjena*) Prijedloga zakona, koji postaje član 11, mijenja se i glasi:

"Član 11.

(Primjena prema pomagačima)

(1) Privremene mjere zamrzavanja fondova i zamrzavanja ekonomskih sredstava pomagača lica optuženih pred MKSJ-om a nedostupnih tom sudu primjenjuju se prema Zakonu o krivičnom postupku Bosne i Hercegovine («Službeni glasnik Bosne i Hercegovine», 3/03, 32/03, 36/03, 26/04, 63/04, 13/05 i 48/05; u daljem tekstu: Zakon o krivičnom postupku).

(2) U skladu sa stavom (1) ovog člana, prema pomagačima lica optuženih pred MKSJ-om a nedostupnih tom sudu Glavni tužilac Bosne i Hercegovine (u daljem tekstu: tužilac) postupa naročito po članu 35. (*Prava i dužnosti*) i 216. (*Naredba o sprovođenju istrage*) Zakona o krivičnom postupku. Na određivanje i provođenje privremenih mjera prema ovim licima primjenjuju se članovi 65. (*Naredba za oduzimanje predmeta*), 66. (*Privremeno oduzimanje predmeta bez naredbe*), 72. (*Naredba banci ili drugom pravnom licu*) i 73. (*Privremeno oduzimanje imovine radi obezbjeđenja*) te ostale odredbe Zakona o krivičnom postupku.

(3) Kada Organizacija ujedinjenih nacija, druga međunarodna organizacija ili Evropska unija odrede primjenu određene restriktivne mjere prema državljaninu Bosne i Hercegovine, ili prema drugom licu a u vezi s postojanjem osnova sumnje da je krivično djelo počinjeno na području Bosne i Hercegovine, tužilac postupa po članu 35. i 216. te ostalim odredbama Zakona o krivičnom postupku, čim sazna za određivanje restriktivne mjere.

(4) Odredbe ovog člana ne utječu na provođenje odluke Organizacije ujedinjenih nacija koju je Bosna i Hercegovina dužna provoditi po međunarodnom pravu niti na međunarodnopravne obaveze Bosne i Hercegovine (član 2. *Međunarodne restriktivne mjere*)."

AMANDMAN IX

Članovi 6. (*Prijedlog*) i 7. (*Odluka*) Prijedloga zakona brišu se.

AMANDMAN X

Član 8. (*Provođenje*) Prijedloga zakona, koji postaje član 12, mijenja se i glasi:

"Član 12.

(Obaveze institucija)

(1) U skladu s odlukom iz člana 10. (*Primjena prema optuženim licima*) stava (3) ili člana 11. (*Primjena prema pomagačima*) stava (1) i (2) o primjeni privremenih mjera prema određenom licu te s odredbama člana 5. (*Značaj privremenih mjera*) i odlukama iz člana 8. (*Izuzeća za životne troškove*) i 9. (*Izuzeća za pojedine obaveze*) ovog zakona, naročito postoje sljedeće obaveze:

a) Sve nadležne institucije u Bosni i Hercegovini koje raspoložu podacima o imovini lica prema kojem se mjere primjenjuju, dužne su u okviru svoje nadležnosti preuzeti konkretne mjere u svrhu primjene privremenih mjera.

b) Sve banke i druge finansijske institucije te osiguravajuća društva u Bosni i Hercegovini, kod kojih lice prema kojem se primjenjuju mjere ima otvoren račun, dužni su onemogućiti novčane transakcije s računa tog lica.

c) Svi organi i institucije u Bosni i Hercegovini koji prema zakonu vode evidenciju o imovini dužni su, u okviru svoje nadležnosti, onemogućiti promjenu prava vlasništva, prenos prava vlasništva ili posjeda i opterećenje imovine.

(2) U smislu tačke c) stava (1) ovog člana, nadležni organi i institucije koje vode evidenciju o imovini izvršice ubilježbu privremene mjere, a registarski sudovi će onemogućiti statusne promjene privrednih i drugih subjekata čiji je vlasnik ili suvlasnik lice prema kojem se primjenjuju mjere ili se na drugi način utvrdi da to lice ima udio u imovini tih subjekata, u vlasničkom, suvlasničkom ili drugom udjelu tog lica."

AMANDMAN XI

Član 9. (*Ukidanje*) Prijedloga zakona, koji postaje član 13, mijenja se i glasi:

"Član 13.

(Prestanak primjene mjera prema optuženim licima)

(1) Primjena privremenih mjera zamrzavanja fondova i zamrzavanja ekonomskih sredstava prema pojedinom licu optuženom pred MKSJ-om a nedostupnom tom sudu prestaje određivanjem prestanka primjene mjere prema tom licu.

(2) Odluku o prestanku primjene mjere prema optuženom licu donosi Vijeće ministara na osnovi liste lica prema kojima se primjenjuju određene mjere, a koju je utvrdila Organizacija ujedinjenih nacija ili Evropska unija. Odluka se donosi izmjenom liste ili na drugi način i objavljuje se u «Službenom glasniku Bosne i Hercegovine».

(3) Razlozi prestanka primjene mjere prema licu optuženom pred MKSJ-om a nedostupnom tom sudu su:

a) ako je optuženo lice prema kojem su određene privremene mjere postalo dostupno institucijama Bosne i Hercegovine ili izravno MKSJ-u; ili

b) ako se utvrdi da je optuženo lice prema kojem su određene privremene mjere preminulo; ili

c) u drugim slučajevima u skladu s međunarodnim pravom.

(4) U svrhu utvrđivanja postojanja razloga za prestanak primjene mjera, Vijeće ministara razmatra listu optuženih lica prema kojima se primjenjuju mjere u najkraćem mogućem roku od ostvarenja kojeg od razloga iz stava (3) ovog člana, a najmanje svaka tri mjeseca od dana početka primjene mjera, ali se privremena mjera ne može prestati primjenjivati u Bosni i Hercegovini prije nego je prestala njezina primjena na međunarodnom nivou."

AMANDMAN XII

Iza člana 9. Prijedloga zakona, koji postaje (izmijenjeni) član 13, dodaje se novi član 14, koji glasi:

"Član 14.

(Prestanak primjene mjera prema pomagačima)

(1) Na prestanak primjene mjera prema pomagaču primjenjuje se Zakon o krivičnom postupku.

(2) Privremena mjera prema pomagaču koja je određena na osnovi ovog zakona, ukinuće se u slučajevima iz člana 13. (*Prestanak primjene mjera prema optuženim licima*) stava (3) tački a) i b), ukoliko ne postoji koji drugi razlog za njenu primjenu prema krivičnom zakonodavstvu Bosne i Hercegovine.»

AMANDMAN XIII

Iza novog člana 14, dodaju se oznaka i naziv poglavlja IV te novi članovi 15. i 16. koji glase:
"POGLAVLJE IV. PREKRŠAJNE ODREDBE

Član 15.**(Povrede odredaba članova 5. i 12. ovog zakona)**

(1) Novčanom kaznom u iznosu od 50.000 do 150.000 KM kazniće se za prekršaj pravno lice ako:

a) protivno odredbama člana 5. (*Značaj privremenih mjera*) i člana 12. (*Obaveze institucija*) stava (1) tačke b), a u skladu sa odlukama iz člana 8. (*Izuzeci za životne troškove*) stavova (1) i (2), 9. (*Izuzeci za pojedine obaveze*) stava (1), 10. (*Primjena prema optuženim licima*) stava (3) ili člana 11. (*Primjena prema pomagačima*) stavova (1) i (2) ovog zakona, ne zamrzne fondove ili ekonomska sredstva koja pripadaju ili su u vlasništvu ili posjedu ili ih drži lice prema kojem se mjere primjenjuju; ili

b) protivno odredbama člana 5. i člana 12. stava (1) tačke b), a u skladu sa odlukama iz člana 8. stavova (1) i (2), člana 9. stava (1), člana 10. stava (3) ili člana 11. stavova (1) i (2) ovog zakona, učini dostupnima fondove ili ekonomska sredstva, direktno ili indirektno, u ime ili u korist lica prema kojem se mjere primjenjuju.

(2) Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 5.000 do 15.000 KM.

(3) Za prekršaje iz stava (1) ovog člana fizičko lice će se kazniti novčanom kaznom u iznosu od 2.000 do 5.000 KM, ukoliko se fizičko lice može zakonito baviti relevantnim djelatnostima.

Član 16.**(Povrede odredaba člana 6. ovog zakona)**

(1) Novčanom kaznom u iznosu od 5.000 do 15.000 KM kazniće se za prekršaj pravno lice ako:

a) protivno odredbi člana 6. (*Obaveza dostavljanja informacija*) stava (1) ovog zakona, ne dostavi odmah po saznanju Ministarstvu bezbjednosti svaku informaciju o provedbi odluke o primjeni mjera prema određenom licu ili ne surađuje s Ministarstvom bezbjednosti u provjeri takvih informacija; ili

b) protivno odredbi člana 6. stava (2) ovog zakona, ne informiše Ministarstvo bezbjednosti o izvršavanju doznaka iz člana 5. (*Značaj privremenih mjera*) stava (3) ovog zakona.

(2) Za prekršaje iz stava (1) ovog člana kazniće se i odgovorno lice u pravnom licu novčanom kaznom u iznosu od 500 do 1.500 KM.

(3) Za prekršaje iz stava (1) ovog člana fizičko lice će se kazniti novčanom kaznom u iznosu od 300 do 900 KM, ukoliko se fizičko lice može zakonito baviti relevantnim djelatnostima."

AMANDMAN XIV

Ispred člana 10. (*Prelazne odredbe*) Prijedloga zakona, a iza novog člana 16, dodaju se oznaka i naziv poglavlja V te novi članovi 17. i 18. koji glase:

"POGLAVLJE V. PRELAZNE I ZAVRŠNE ODREDBE**Član 17.****(Praćenje primjene finansijskih privremenih mjera prema optuženim licima i pomagačima)**

(1) Ministarstvo bezbjednosti prati primjenu privremenih mjera prema licima optuženim pred MKSJ-om a nedostupnim tom sudu i njihovim pomagačima i o tome izvještava Vijeće ministara po potrebi, a najmanje svaka tri mjeseca, ili na zahtjev Vijeća ministara.

(2) Ministarstvo bezbjednosti će u okviru svojih ovlaštenja preuzeti odgovarajuće mjere u svrhu sprečavanja postupaka koji bi mogli dovesti do posljedica suprotnih sadržaju privremenih mjera.

Član 18.**(Praćenje provođenja međunarodnih restriktivnih mjera)**

(1) Za praćenje provođenja međunarodnih restriktivnih mjera iz člana 2. ovog zakona, na zahtjev Predsjedništva Bosne i Hercegovine ili prijedlog Ministarstva inostranih poslova ili Ministarstva bezbjednosti, Vijeće ministara osniva međuresornu grupu za praćenje provođenja međunarodnih restriktivnih mjera (u daljem tekstu: međuresorna grupa).

(2) Međuresorna grupa je stalno radno tijelo.

(3) Međuresornu grupu čine predstavnici ministarstava nadležnih za inostrane poslove, bezbjednost, odbranu, finansije, ekonomske odnose i pravdu.

(4) Stručne i administrativne poslove za međuresornu grupu obavlja Ministarstvo inostranih poslova.

(5) Način rada međuresorne grupe urediće se poslovníkom kojeg donosi sama grupa."

AMANDMAN XV

Član 10. (*Prelazne odredbe*) Prijedloga zakona, koji postaje član 19, mijenja se i glasi:

"Član 19.**(Usklađivanje ranijeg propisa)**

Vijeće ministara će uskladiti svoju "Odluku kojom se licima osumnjičenim od Međunarodnog krivičnog suda za bivšu Jugoslaviju, koja nisu dostupna tribunalu onemogućava da raspoložu svojom imovinom u Bosni i Hercegovini", broj 274/04 od 19. novembra 2004. godine ("Službeni glasnik Bosne i Hercegovine", br. 60/04) s odredbama ovog zakona."

Posljednji član Prijedloga zakona, očitoma označen rednim brojem 9 (*Stupanje na snagu*) postaje član 20, a u nazivu člana se iza riječi "snagu" dodaju riječi "ovog zakona", pa član glasi:

"Član 20.**(Stupanje na snagu ovog zakona)**

Ovaj zakon stupa na snagu osmog dana od dana objavljivanja u "Službenom glasniku Bosne i Hercegovine"."

3. Jednoglasno prihvatila tekst Prijedloga zakona o primjeni privremenih mjera prema osobama koje su optužene a nisu dostupne Međunarodnom krivičnom sudu za bivšu Jugoslaviju i osobama uključenim u pružanje pomoći osobama optuženim od strane Međunarodnog krivičnog suda za bivšu Jugoslaviju kako ga je predložio Vijeće ministara sa usvojenim amandmanima.
4. Konstatirala da je predloženi zakon neophodno donijeti.

U smislu odredbi člana 89. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenuje se predsjedavajući Komisije Mirsad Ćeman.

Ad. 9. Zahtjevi Ustavnog suda BiH za davanje odgovora na:

- a) Zahtjev **Borislava Paravca** za ocjenu usaglašenosti sa Ustavom BiH odredbi člana 5. tačka 2. i 6.; člana 7. tačka 2.; člana 46. tačka 3.; člana 49. tačka 3. i člana 51. tačka 2., 4. i 5. **Zakona o osnivanju kompanije za prenos električne energije u BiH** ("Službeni glasnik BiH" br. 35/04); Nakon kraće rasprave Komisija je ostala pri tome da osporene odredbe nisu u suprotnosti sa Ustavom BiH.
- b) Zahtjev **Sulejmana Tihica** za ocjenu usaglašenosti sa Ustavom BiH odredbi člana 8.1 stav 1. i 2. **Izbornog zakona BiH** ("Službeni glasnik BiH" br. 23/01, 7/02, 9/02, 20/02, 25/02, 25/02, 4/04 i 25/05); Nakon kraće rasprave Komisija je ostala pri tome da osporene odredbe nisu u suprotnosti sa Ustavom BiH.

Ad. 10. Ostala pitanja

Kako nije bilo drugih prijedloga za ovu tačku dnevnog reda predsjedavajući je u 14,15 sati zaključio sjednicu.

Napomena: Odlukom Kolegija sekretara Parlamentarne skupštine sjednice komisija se ne snimaju.

SEKRETAR KOMISIJE
Milan Zjajić

PREDSJEDAVAJUĆI KOMISIJE
Mirsad Ćeman